

Garraiolarien greba

Protesta errepidean nabarmendu da

Garraio grebak luze iraungo duela iragarri dute kamioizaleen ordezkariak

Joseba Aiarza / Bilbo

GARRAIO greba gero eta orokorragoa dela jakinarazi dute garraiolariak. Lehenengo egunean Bizkaian, Gipuzkoan eta Kantabriaren bakarrik izan zen erabatekoa, baina atzo, Araba eta Nafarroa ere hedatu zen, nahiz eta azken herrialde horretako garraio elkarteek grebarekin bat ez egin. Espainian ere lanuztea indarra hartzen ari da pixkanaka.

Pedro Gomez Sintrabiko idazkariaren hitzetan, Bizkaian zehar garraiorik ez da mugitzen dagoneko, eta Bilboko portua erabat itxita dago. Gipuzkoan, kamioizaleek trabatu egiten dituzte errepide nagusiak, batez ere N-1 Lasarte inguruan, eta Irungo muga ere aldika ixten dute, Guardia Zibilak berriz ere zabaldu arren.

Errepide horretan dozenaka kamioi ikus zitezkeen atzo bazterbideetan, eta zenbaitetan errepideetan bertan ere, trafikoa oztopatzeko. Irungo muga itxita egon zen ostegun arratsaldetik atzo goizaldera arte, kamioi eta auto ilara luzeak sortaraziz, nahiz eta autoei eta merkantzia arriskutsuak zekartzaten kamioiei pasatzen utzi.

Euskal garraiolarien ordezkariak ziurtzat eman dute deialdia arrakastatsua gertatzen ari dela. Hala ere, istilurik ia batere ez dela gertatzen ari azpimarratu dute, baina beren kamioiak gelditu nahi ez zituzten garraiolariak tirabirak izan dituzte pikeetekin. Irungo mugan polizia ugari dago trafikoa zabaltzeko.

Hego Euskal Herrian ezetik, Estatu osoan ere lanuztea orokortzen ari dela esan du Gomezek, «nahiz eta sektoreko CETM

Garraiolarien grebak trafiko arazo ugari eragin du Gipuzkoan hasi denetik hona. Hornidura arazoak datorren astean has litezkeela uste dute sektorean. Administrazioaren aldetik negoziatzeko mugimendurik ez dago, eta gatazkak luze iraungo duela iragarri dute.



Ertzainak garraiolarien bide oztopatzea eragotzi nahian, atzo arratsaldean Lasarte parean.

ANDER GILLENEA

elkarte patronalak, Fenadismen elkarte sumisoak eta Garraio Ministerioak berak toxikazio trikimailuak erabili». Lanuztea indarra hartzen ari da Galizian, Andaluzian eta Katalunian, batik bat Frantziara doan autobidean.

Garraiolariak argi utzi nahi dute kontsumo gaien hornidura bermatzeko ahalegin guztiak

egin dituztela, eta gutxienez asteburu honetara arte ziurtatuta egongo dela. Astelehenetik aurrera, ordea, lehenengo arazoak antzematen hasteko posibilitateak daudela ohartarazi du Sintrabiko buruzagiak.

Lanuzteak luze joko duela uste dute sindikatuek, ikusirik Gubernuak ez duela agertu negozia-

tzeko inolako borondaterik. Izan ere, ordezkariak ez dute uste Madrilin inolako asmorik duenik sektoreko jubilazio aurreratutarako egitasmoa finantzatzeko —planak urtean 150.000 milioiko kostua izango luke—, Estatuaren aurrekontua zehaztuta dagoelako eta gastu publikoa murriztu beharrean dagoelako. X

Lakuako langileek ordubeteko lanuztea egin dute

■ Iazko lan hitzarmena ez betetzea leporatu diote Eusko Jaurlaritzari

Efe / Gasteiz

GASTEIZ-KO Gubernuko langileek ordubeteko lanuztea egin zuten atzo, Gubernuak iazko lan itunean hitzartutakoa bete ez duela-eta Funtzio Publikoaren lege berraren kontra protesta egiteko. Orotara, 5.500 lagunek dihardute Lakuan eta Eusko Jaurlaritzak Donostian eta Bilbon dituen egoitzetan.

Protestan parte hartzeko deialdia sindikatu guztiek zuten egin. Lanuzteaz gain, 200 funtzionario inguru Lakuko sarreran bildu ziren eta eraikinari buelta eman zioten protesta egiteko. Jaurlaritzak esan duenez, Lakuako langileen %16k hartu zuten atzoko protestan.

Aurreko urteko lan hitzarmenak hainbat lanposturen lekualdaketa egiteko lehiaketa publikoa egingo zela agintzen zuen. Gubernuak, ordea, ez du oraindik lehiaketarako deialdirik egin, eta ez dirudi egingo duenik ere. Sindikatuen ustez, «Funtzio Publikorako Lege berria indarrean noiz jarriko zain dago Gubernua». Izan ere, lege berraren arabera, Gubernuak ez du derrigorrez lehiaketa publiko horiek antolatu eta deitu behar.

Arau berriak Funtzio Publikorako batzordearen osaketa ere aldatzen du. Orain artean Administrazioako 12 ordezkari eta sindikatuetakoa beste 12k osatzen zuten batzordea. Legea indarrean jarri gero, berriz, sindikatuen ordezkariak erdira murriztuko dute. X

Bere jarrera zertxobait malgutu du Gipuzkoako metal sektoreko patronalak

■ Datozen egunotako mobilizazio «gogorrak» iragarri dituzte sindikatuek

A. Agirreurreta / Donostia

ADEGI Gipuzkoako patronalak eman du lehen urratsa, eta metal sektorearen lan hitzarmena negoziatzeko proposamenaren puntuetako bat baztertzea onartu du.

Metaleko enpresariak bilera egin zuten atzo goizean Donostian, eta bilkura amaituta Adegi-ko arduradunek adierazi zutenenez, antzinasuneko soldata gehigarriak ordaintzea onartu dute. «Nahasmendua sortzen ari da langileen artean antzinasun gehigarriak ordezkatzeko egin dugun proposamena dela eta. Horregatik, eskaera hori baztertzea erabaki dugu».

Horrez gainera, sindikatuek leporatu dioten «jarrera itxia» ukatu zuen Adegi. «Elkarriketarako borontatea» badutela diote Adegiok, eta datorren aste-

lehenerako bilera batera deitu die patronalak sindikatu guztiei aurtengo lan hitzarmena negoziatzeko jarraitzeko.

Nolanahi ere, eta Adegi bere jarrera malgutu duela jakin baino lehen Bilbon egindako agerraldi batean, sindikatu guztiek mobilizazioak gogortzeko prest daudela iragarri dute. Sektorean aurreko astean egin grebak ez duela oraindik patronalaren jarrera aldarazi eta mobilizazioak areagotu egin behar dituztela esan dute langileen ordezkariak.

Heldu den asterako 48 orduko greba prestatu dute Araban, Bizkaietan eta Gipuzkoan. Probintzien egoera berbera ez bada ere, bigarren lanuzte deialdia bateratua izango da, eta hilaren 13an eta 14an egingo dute greba EAEko metal lantegiek. «Patronalak ez du bere jarrera ezertan ere aldatu. Araban eta Gipuzkoan egoera

larriagoa da, patronala lan hitzarmena negoziatzeko bileretara ez baita agertzen». Hala azpimarratu zuten ELA, LAB, UGT eta CCOO sindikatuetakoa ordezkariak atzo Bilbon egin zuten agerraldian.

Gipuzkoan soldatak % 4,6 igotzeko eskatzen dute sindikatuek, eta patronalak % 2,6ko igoera proposatzen du. Bizkaian % 5eko soldata igoera nahi dute langileek, eta enpresariak % 2 igotzea besterik ez dute nahi. Araban aurreko urteko eta aurtengo lan hitzarmena dago jokoan. Nolanahi ere, langileen eta patronalaren arteko ezadostasunak hasi zirenetik sindikatuek garbi esan dutenez, soldata igoerak baino garrantzitsuagoa lanaldia murrizteko luzatutako proposamena da. Izan ere, enplegua sortzeko bultzatzeko, 37 orduko lan asteak nahi dituzte langileek. X



Aurreko astean bezala hurrengoan ere kalera aterako dira metaleko langileak. XOUSE SIMAL